

Uunga siunnersuut: Tikeraat ornittagaannik takornariartitsivinnillu pilersitsisarneq ingerlatsinerlu pillugit Inatsisartut inatsisaat nr. xx, xx. xxx 2016-imeersoq
(Inuussutissarsiornermut, Suliffeqarnermut, Niuernermit Nunanullu Allanut Naalakkersuisoq)

Akissutitut allakkiaq

(Inuussutissarsiornermut, Suliffeqarnermut, Niuernermit Nunanullu Allanut Naalakkersuisoq)

Aappassaaneerera

Matumuuna Inuussutissarsiornermut Ataatsimiititaliap isumaliutissiissutaanut, minnerunngitsumillu ataatsimiititaliap siunnersuummik akerliusoqaranik akuersaerneranut Naalakkersuisut sinnerlugit qujavunga.

Siunnersuut tassaavoq Naalakkersuisut nunamut tamarmut atortussamik Takornariartitsinermit 2016-2020-imi periusissiaannik Kalaallit Nunaanni takornariartitsinikkut ineriartortitsineq 2016-2020 ”Qanoq iliortoqartariaqarpa?”-mi qitiusut ilaat. Anguniagaq tassaavoq nunap immikkoortuini tikeraat ornittagaannut sinaakutissanik pilersitsinissaq, taakku nunarsuarmi pitsaanerpaatut misigisaqarnissamut tikiffissatut Kalaallit Nunaat nunarsuarmi inississammassuk.

Ingerlatsiviit ataasiakkaat nunap immikkoortuisa ataasiakkaat tamarmik immikkoortuannik assisaqanngitsumillu oqaluttuarisaanerannik erseqqissaallutillu paasisitsiniuteqassapput, tamarmillu isigalugit Kalaallit Nunaat tamarmiutillugu misigisanut pitsaasunik ilapittuissallutik.

Inatsisip aamma takornariartitsinermit periutsip atuutsilernerinut atatillugu ataatsimiititaliap isummersuuteqarluarneri Naalakkersuisut sianiginiarpaat. Tassunga atatillugu nunami katersugaasivinnut naleqqiullugu akisussaaffeqarfiit pitsaasumik ataqatigiissinnissaat killiliiffiginissaallu qulakkeerneqassaaq. Ilaatigut kultureqarnerup, oqaluttuarisaanerup takornarianullu misigititassat iluanni ilisimasamik paasisitsiniaanermillu oqimaaqatigiissaartumik ataqatigiissaarluakkamillu neqeroorutaasut qulakkeernialerutsigit pissutsit tamakku pingaartuunerat Naalakkersuisut isumaqataaffigaat.

Aammattaaq tikeraat ornittagariligassaannik pilersaarusiornerni najukkami tunngaviliinerup kommuninillu ilanngussuinerup qulakkeernissaat Naalakkersuisut isumaqataaffigaat. Tamannalu – najukkami neriunartoqarfiit aamma Kalaallit Nunaanni takusassaqqissunik nukittorsaanerit aamma paasisitsiniaanerit aqqutigalugit –tikeraat ornittagaat nutaat najukkami takornariartitsinermit ineriartortitsinermik siuarsanermillu pilersitsinissaat qulakkiissagutsigu minnerunngitsumik pingaaruteqartuuvoq.

Ilulissat kangerluanni tikeraat ornittagaannut assingusumik suliniutit ataasiakkaat ineriartortinnerannut atatillugu namminersorlutik oqartussat aamma kommunit ataasiakkaat akornanni qanimut suleqatigiinneq pilersinneqassaaq. Saniatigut Ilulissani Kangiani ingerlatsivimmit isumassarsiffeqarluni tikeraat ornittagaannut ataasiakkaanut ”advisory boards”-inik taaneqartartunik pilersitsisoqarsinnaavoq, taakku najukkami, nunami namminermi aamma nunat tamalaani ilisimasanik tikeraat ornittagaannik ataasiakkaani ingerlatsinermi ineriartortitsinermilu ilanngussueqataasussanik.

Tikeraat ornittagaat takornariat amerlanerit Kalaallit Nunaannik tikeraartalernissaannut, aammalu sumiiffinni ataasiakkaani tamani takornariat sivisunerusumik najuutsittarnissaannut ilapittuuteqassapput, taamaalilluni annertunerusumik kaaviiartitsineq pilersinneqassalluni. Taamaattumik tikeraat oornittagaliernerit takornariatitsinermi inuiaqatigiinni aningaasaqarnikkut iluanaarutit najukkanut siammartinnissaannik pilersitseqataassanerat naatsorsuutigineqarpoq.

Aammattaaq katersugaasivinnik, kulturip illorsuinik sullissisarfinnillu allanik attuumassuteqartunik saqquminiarnissamut sammisat, isissutissanik suleqatigiinnerit il.il. pillugit tikeraat ornittagaat ataqatigiissaaralutillu suleqatigisaqarnissaat siunertarineqarpoq.

Inuussutissarsiornermut Ataatsimiititaliap inassutigisai Naalakkersuisut siunnersuummi matumani, aamma nunami namminermi takornariatitsinermut periusissiami anguniagaannut tulluurtuunerat Naalakkersuisut isigaat. Taamaalillutik ataatsimiititaliap innersuussutaannut naapertuulluurtumik suliap ingerlateqqinnerata naammassinissaa Naalakkersuisut suliaqarfigalugu isumannaarniarpaat.

Taamatut oqaaseqarlutik Inatsisartut siunnersuummik suliaqarfiginnissaat Naalakkersuisut qilanaaraat.